

摘藻堂四庫全書薈要

史部

欽定四庫全書叢要

史部

春明夢餘錄卷四十一

臣紀昀詳校

詳校官編修臣繆晉



欽定四庫全書薈要卷七千六百九十一

史部

春明夢餘錄卷四十

吏部侍郎孫承澤撰

禮部二

正士習

宗伯馮琦疏頌者皇上納都給事中張問達之言

正李贄惑世誣民之罪盡焚其所著書其于崇正

闢邪甚盛舉也臣竊惟春秋大一統統者統于一

也統於聖真則百家諸子無敢抗焉統于王制則



卿大夫士庶無敢異焉國家以經術取士自五經
四書性鑑正史而外不列于學宮不用以課士而
經書傳注又以宋儒所訂者為準蓋即古人罷黜
百家獨遵孔氏之旨此所謂聖真此所謂王制也
自人文向盛士習寢漓始而厭薄平常稍趨纖靡
纖靡不已漸騖新奇新奇不已漸趨詭僻始猶附
諸子以立幟今且尊二氏以操戈背棄孔孟非毀
程朱惟南華西竺之語是宗是競以實為空以空

為實以名教為桎梏以紀綱為贅疣以放言恣論
為神奇以蕩棄行檢掃滅是非廉恥為廣大取佛
經言心言性略相近者竄入於聖言取聖言有空
字無字者強同於禪教嗟乎聖經如此解乎士子
制義以聖人口氣傳聖人之神耳聖人之世曾有
此語意否乎夫學宮所列至詳童而習之白首未
必能窮世間寧有經史不能讀而於經史之外博
極羣書之理棄本業之精髓拾異教之殘膏譬如

以中華之音雜雕結之語語道既為踳駁論文又不成章世道潰于狂瀾經學幾為榛莽部科交列其弊明旨申飭再三而竟未能廓然一大變其習者何也解書或用註疏或不用註疏則趨向不一也論文或正體而取平典或憐才而收奇俊則鑒裁不一也同是違制而或叅或不叅則法令不一也同是被叅而或以為當處或以為可以無處則議論不一也士有不一之趨向取士乃有不一之

鑒裁而又以不一之議論行不一之法令政體且有二三士習何由歸一即如燒毀異說去年奉有明旨督學而下何曾禁止一處燒毀一書等經學于弁髦得詔書而掛壁如此即朝廷之上三令五申亦復何益臣請一取裁于聖人之言與天子之制而定為畫一之法士子授受當先明經術講書行文以遵守宋儒傳註為主二三場以淹貫性鑑正史為主其有決裂聖言背違王制一切坊間新

說皆令地方官雜燒之各該提學官員仍具文報部要見黜過險詖邪妄之士幾人焚過離經叛道之書幾部兩京各省鄉試錄及中式墨卷亦以聖言王制為準違聖言則叅不違則否背王制則叅不違則否官司評隲送科覆閱各以虛心平心從公從實互相叅較不得遠近異法輕重異處致有後言伏乞天語叮嚀敕下部院斷在必行行之三年而士習不歸雅則臣等與天下督學官員均受

其咎乃臣等猶有說焉自古世道升降之會往往
以士大夫好尚為徵世之治也高明之士盡以其
才識用之修政立事主于為國其議論必典實平
確而天下靡然從之世之衰也盡以其才識用之
談玄課虛主于自為其議論必奇僻空曠而天下
亦靡然從之自古有僊佛之世聖學必不明世運
必不盛即能真詣其極亦與國家無益何況襲咳
唾之餘以自蓋其名利之跡者乎夫道術之名久

矣自西晉以來於吾道之內自分兩岐又其後則
取釋氏之精蘊而陰附於吾道之內又其後則尊
釋氏之名法而顯出于吾道之外非聖主執中建
極揭皎日于中天士大夫一德同風挽頽波于砥
柱悠悠世道臣等未知所屆也得旨祖宗維世立
教尊尚孔子明經取士表章宋儒近來學者不但
非毀宋儒漸至詆譏孔子掃滅是非蕩棄行檢復
安得忠孝節義之士為朝廷用祇緣主司誤以憐

才為心曲收好奇新進以致如此新進未成之才
只宜裁正待舉豈得輒加取錄以誤天下覽卿等
奏深于世教有裨還開列條款來務期必行僊佛
原是異類宜在山林獨修有等好尚的任解官自
便去勿與儒術並進以混人心

行人高攀龍疏臣惟自古治天下者未有不以教
化為先務而教化之污隆則學術之邪正為之是
以聖帝明王必務表章正學使天下曉然所趨

截然有所守而後上無異教下無異習道德一風俗同賢才出而治化昌矣臣見四川僉事張世則一本大畧自謂讀大學古本而有悟知程朱誤入之甚謂朱熹之學專務尚博不能誠意成宋一代之風俗議論多而成功少天下卒于萎靡而不振于是以所著大學初義上獻欲施行天下一改章句之舊臣惟自昔儒者說經不能無異同而是非不容有乖謬是非謬則萬事謬矣以程朱大賢謂

其學不能誠意謂其教曰誤人之甚是耶非耶議之于私家猶為一人偏說而于聖賢無損鳴之于大廷則遂足以亂天下之觀聽而於世教有害臣有不容已于言者矣夫自孟子沒而孔子之學無傳千有四百年而始有宋儒周惇頤程顥程頤張載朱熹得其正傳而絕學復續學者始知所從入之途其功罔極矣然是五賢者生于宋而宋不能用其學之萬一前則章惇蔡京之徒斥之為姦黨

後則韓侂冑之徒斥之為偽學貶逐禁錮以迄于
亡恭惟我太祖天縱神聖作民君師首立太學拜
許存仁為祭酒以司教化存仁為先儒許謙之孫
謙承朱熹正學而存仁承上命以為教一宗朱氏
之學令學者非四書五經不讀非濂洛關閩之學
不講而天下翕然向風矣我成祖益章而大之命
儒臣輯五經四書大全傳註一以濂洛關閩為主
自漢儒以下取其同而刪其異別以諸儒之書類

為性理全書同頒布天下永樂二年饒州儒士朱
友季詣闕獻所著書專詆毀周程張朱之學上覽
而怒曰此儒之賊也特遣行人押友季還饒州令
有司聲罪杖遣悉焚其所著書曰毋誤後人于是
邪說屏息吾道中天矣迄今二百餘年以來庠序
所教制科所取一票于是真儒如薛瑄胡居仁吳
與弼陳真晟曹端羅倫莊昺章懋張元禎陳茂烈
蔡清陳獻章王守仁諸人彬彬盛矣至一代之風

俗上有紀綱下重名節當變故之秋率多仗義死
節之士值權姦之際不之敢言直諫之臣賢士大
夫之公評士庶之清議是非井然有不當于人心
羣起而議其後至于今上下相維非祖宗教育之
明驗歟不意今日乃有如世則肆然欲變祖宗表
章之至意率天下而盡背之也夫程朱之學其始
終條理之全下學上達之妙固未易言語形容然
其大要則不出涵養須用敬進學在致知二語此

非程朱之教也孔子之教也故窮理即博文之謂也居敬即約禮之謂也非孔子之教也堯舜之教也故博文即惟精之謂也約禮即惟一之謂也二者合一並進而主敬為本故理日明瑩則心日靜虛動直而初非溺於詞章心益定靜則理益資深逢源而初不流于空寂此聖學所以允執其中也至大學一書程子所揭為初學入德之門而章句之作則朱子所為一生竭盡精力之作後人學未造其域

豈容輕議況古書皆有簡錯古本安可盡信世則之言誠意是矣豈諸儒獨不教人誠意乎誠者聖人之本學之所以成始成終功先格致正所以誠正也意有不誠心有不正即非所以為格致也若夫溺于記誦徇外忘本此俗學所以為陋豈大學格致之教哉夫孔子之道至程朱而闡明殆盡學孔子而必由程朱正如入室而必由戶善學者默而識之心逸日休況今天下不患無論說而患無

躬行就聖賢已明之道誠心而力行則事半而功
倍矣何必嘵嘵焉必務自私用智欲伸其一己之
說為也世則又以宋之不振歸咎于諸儒之學噫
是何言也人主不能用其道雖以孔子之聖生于
魯而不能救魯之衰微何疑于諸儒宋之亡也由
前而言則壞于新法由後而言則壞于和議今不
咎王安石呂惠卿蔡京章惇黃潛善汪伯彥秦檜
韓侂冑之徒而咎諸儒之學何心哉夫所謂議論

多而成功少者非言者之罪而用言者之罪也自古芻蕘獻說工瞽陳規其議論不至多然而上之人善于用中則片言可折而盈廷可廢天下見事功之實而不見議論之虛上之人漫無可否則人持所見而邪正雜陳徒滋耳目之煩無補經綸之實耳豈以人人緘默而後為盛世乎世則又謂本朝持衡國是者無決斷之勇分猷庶職者有模稜之風庠序無真才實學之士朝廷鮮實心任事之

臣此信有之正不學之故也奈何反以咎程朱之學也抑臣有深憂焉自世廟以前雖有訓詁詞章之習而天下多實學自穆廟以來率多玲瓏虛幻之談而弊不知所終笑宋儒之拙而規矩繩墨脫落無存以頓悟為工而巧變圓融不可方物故今高明之士半已為佛老之徒然猶知儒之為尊必藉假儒文釋援釋入儒者內有秉彜之良外有惟皇之制也而其隱衷真志則皆借孔孟為文飾與

程朱為讎敵矣故今日對病之藥正在扶植程朱之學深嚴二氏之防而後孔孟之學明使世則之言一昌天下之棄其讎敵也不啻芻狗焉陛下皇建有極端本化人身體孔孟之微言首崇程朱之正學必親經書以窮理必收放心以居敬朝乾夕惕省察克治體二祖之意振正學于陵夷廢墜之餘明詔中外非四書五經不讀而不得浸淫于佛老之說非濂洛關閩之學不講而不得淆亂以新

奇之談學無分門士無異習人心貞一教化大同如是而人才不出政治不墜者從古以來未之有也

貢舉

朱文公熹于光宗時著升貢議曰古學校選舉之法始于鄉黨而達于國都教之以德行道藝而興其賢者能者蓋居之者無異處官之者無異路取之者無異術故士有定志而無外慕蚤夜孜孜惟

懼乎德業之不修夫子所謂言寡尤行寡悔而祿在其中孟子所謂修天爵而人爵從之者也今學校所教既不本于德行而所謂藝者又皆無用之空言其又弊則所謂空言者又皆怪妄無稽而適以敗壞學者之心術治經者不復讀經之本文與先儒之傳註但取近年科舉中選之文諷誦摹倣轉相祖述以治經為經學之賊以作文為文字之妖也是以人才日衰風俗日壞朝廷郡國有一疑

事嘗試如公卿大夫官人百吏相顧胎愕而不知
所從亦可以知其為教之得失矣議者不原本其
所自尚猶以程試文字之不工為大患豈不謬哉
古大學之教在於致知格物而考較之法又以九
年知類通達強立不反為大成蓋天下之理皆學
者所當知而理之載于經者固各有官而不苟相
混也況今樂亡禮缺二戴所記已非正經而治經
者又類舍其所難而趨其所易僅窺其一而不及

其餘於天下之事宜有不能盡通其理者矣若諸子之學同出于聖人各有所長而不能無所短其長者固不可以不學而所短者亦豈可不精擇為趨舍哉至于諸史該古今興亡治亂得失之變而禮樂制度天文地理刑法兵制之屬在焉皆當世所須而不可闕者一旦欲盡通其理勢固有所不能惟合所當讀之書分年而課試之使天下之士各以三年而通其三四之一則亦宜若無甚難者

今欲諸經各立家法主注疏而討論諸儒先之說
附焉以易詩書為一科子午年試之周禮儀禮及
二戴禮為一科卯年試之春秋三傳為一科酉年
試之皆兼大學中庸論語孟子論則分諸子為四
科分年附焉策主諸史時務傳焉將士無不通之
經無不習之史德成材達而可為當世之用若學
校之師必遵仁宗之制選士之實有道德可為師
表者為學官而久其任使講明道術而裁減解額

舍選謬濫之恩獨使為之師者考察其德行之實以聞而命之官則大學之教不虛而懷利干祿之流自無所為而至矣文公此語可為百世法

崇禎六年癸酉二月初三日諭祖制設科取士專為致治求賢近來士習日偷舉貢失當真才鮮少理道不彰由督學教諭訓導各官董率乖方培養無術盡失舊制初意以致朝廷不獲收用人之效朕思士子讀書進身乃人才根原必宜首重德行

幼學壯行如生平果係孝悌廉讓自然做官時不貪不欺盡忠竭節何必專工文藝據會典及提學敕書內敦尚行誼以勵頽俗不專論文優劣開載甚明近來通不遵行至小學諸書乃州縣各有社學原欲養蒙育德敷教儲才近來全不講論興舉其士子自童時入塾以迨應試登科只以富貴溫飽為志竟不知立身修行忠君愛國之大道如此教化不行士風吏治安得不日趨卑下朕惟祖宗

朝求才用賢原不盡拘科目至考試文義正欲因
言徵人亦非專尚浮詞務華遺實今欲祇遵祖制
起敝還醇童生必先入學遇試先查德行自儒童
以及鄉會須有實蹟方許入場異日敗行考官挨
論又教官為士子師長化導最親舊制甚重近皆
以衰庸充數教術全廢此尤士風不正之源今
設法興起看吏禮二部同都察院及該科詳議明
確具奏至海內之大豈無潛修碩德純孝鴻才清

志剛方實堪大用者更宜持拔一二以示風勸至
于科道不必專出考選館員應令先歷推知并着
酌議來行

宗伯黃汝良疏竊惟臣等頃所條奏文體款項不
過科場之防維時文之針砭耳茲恭捧綸音臣等
聞繹再四仰見我皇上端本澄源至意洞晰古今
有非臣等愚陋所及敢一對揚而敷陳之按周官
以鄉三物教萬民而賓興之先六德曰智仁聖義

中和次六行曰孝友睦婣任恤次乃及六藝曰禮樂射御書數可見德行在六藝之先也孔門以四科程及門高弟首曰德行次乃及言語政事文學可見德行居四科之首也比及漢唐宋以制策詩賦經義取士雖寢非古初然而賢良方正經明行修之舉未嘗不相輔而行我國家因時變通設科試士程以制義分為三場然高皇帝時首重德行情意尤拳切如大誥有頒明倫有堂禮賢有館孝廉

有舉天理行事有教學宮有卧碑鄉約有聖訓褒
節義之福壽黜失節之危素至處士有行誼如陶
安王禕章濫陳遇等時加徵辟列聖相承率循斯
軌所以三百年來士貴名節人重清修即應試之
文多醇正典雅無非道德所發揮即文章亦德行
也乃邇來習尚陵夷風俗靡敝行誼既乖文章亦
舛禮義廉恥俱嗤為贅談背公營私相沿為故事
攘官則不勝其衆任事則鮮有其人甚至以紳佩

而祝閭祠以衣冠而降盜賊世道人心敗壞至此
極矣宜聖心穆然有德行之思也竊謂取士固宜
先德行而尤貴在豫養方今士習久錮驟挽為難
則惟有豫養一法耳董仲舒有言不素養士而欲求
賢譬猶不琢玉而求文采也在易之蒙曰山下出
泉蒙君子以果行育德伊訓列三風十愆以儆有
位而總其要曰具訓于蒙士蓋豫養于蒙則教易
入而德成以之修身則自可以果行育德以之入

仕自可免三風十愆所謂少成若天性習慣成自然者也古之教者家有塾黨有庠州有序國有學順序漸進無非先勗以六德六行而後及六藝故曰行有餘力則以學文今之教者自少至長自長至壯所學習者皆咕嗶文藝之事所經營者皆富貴溫飽之圖一切登第為官竟不知德行為何物無怪其四維不張而百事決裂也合無敕下臣部劄行各省直學臣刊為條教頒下府縣塾師俱籍

名于官有能以孝經小學教育童蒙俾之入孝出
悌幾幾小子有造者塾師榮以衣巾其子弟敗類
而不戒戢者塾師有罰教官有能以規矩準繩表
率子衿俾之飭躬勵行斌斌成人有德者教官註
以上考其生童入試須令州縣教官各取保結無
過犯方准進場有貶倫而失簡舉者教官與州縣
官有罰至于提學一官尤為宣上率下機要必于
文字外加意作興其諸生行誼著聞文雖平加以

優等素行薄劣文雖工黜革示懲實能奉行敕書
者查覆紀錄如彰瘡不明勸懲無法提學官有罰
乃若舉貢生儒及山林隱逸有篤學不倦秉誼由
衷砥礪潛修志行邁衆者府縣官核實申之督學督
學核實申之撫按撫按核實上之朝廷朝廷覈實
而旌表加焉其尤殊高等者特加徵召如洪武中
陶安等天順中吳與弼等故事果稱得人舉主紀
錄否則舉主亦與其罰至于廟堂廣勵有位尤當

以德行為先大抵進廉而黜貪抑競而獎恬貴名
節重清議如孔門四科即言語政事文學猶其後
耳如此則父兄子弟所勗勵者無非德行之事耳
目見聞所榮羨者無非德行之人士風庶可挽偽
而還醇世道庶可反邪而歸正夙習可祛而太平
可幾矣

弘治中王鏊制科議國家設科取士之法其可謂
正矣密矣先之經義以觀窮理之學次則論表以

觀其博古之學終之策問以觀其時務之學士誠

窮理也博古也識時務也當復何求然行之百五

十年宜得其人超軼前代卒未聞有如古之豪傑

者出于其間而文詞終有愧于古雖人才高下係

于時然亦科目之制為之也夫科目之設天下之

士羣趨而奔向之上意所向風俗隨之人才之高

下士風之淳漓率由是出三代取士之法吾未暇

論唐宋以來科有明經有進士明經即今經義之

謂也進士則兼以詩賦當時二科並行而進士得
人為盛名臣將相皆是焉出則明經雖近正而士
之拙者則為之謂之學究詩賦雖近于浮艷而士
之高明者多向之謂之進士詩賦雖浮艷然必博
觀泛取出入經史百家蓋非詩賦之得人而博古
之為益于治也至宋王安石為相黜詩賦崇經學
科場以經義論策取士可謂一掃歷代之陋也然
士專一經白首莫究其餘經史付之度外謂非已

事其學誠專其識日陋其才日下蓋不過當時明
經一科耳後安石言初意驅學究為進士不意驅
進士為學究蓋安石亦自悔之矣今科場雖兼策
論而百年之間主司所重惟在經義士子所習亦
惟經義以為經義既通則策論可無俟乎習矣近
來頗尚策論而士習既成亦難猝變夫古之通經
者通其義焉耳今也割裂裝綴穿鑿支離以希合
主司之求窮年畢力莫有底止偶得科目棄如弁

髦始欲從事于學而精力竭矣不能復有進矣人
才之不如古其實由此也然則進士之科可得易
乎曰科不竢易也經義取士其學正矣其義精矣
所恨者其途稍狹不能盡天下之才耳愚欲于進
士之外別立一科如前代制科之類必兼通諸經
博洽子史詞賦乃得預焉有官無官皆得應之其
甲授翰林次科道次部屬而有官者則遞陞焉如
此天下之士皆將奮志于學雖有官者亦翹翹然

有興起之心無復專經之陋矣或曰今士之一經俱不能精如餘經何曰制科以待非常之士也以科目收天下士以制科收非常之才如此而後天下無遺才故曰科不迭易也

謝鐸科舉議周子曰天下勢而已矣勢之至雖聖人亦莫如之何故由忠而質由質而文聖人非不知忠質之貴及其至也亦不得而不文然文勝至于滅質則本亡矣于此而不有以迴幹之變通之

以不失乎先王之意矣可哉蓋自先王之政廢而民無恒產則無恒心無恒心則毀譽之口不勝其愛惡之私于是鄉舉里選之法不得不變而為後世科舉之制此勢也非得已而為之者也善因其勢者謂之隨時于是而迴幹通變之而先王之意存焉是故今科舉罷詩賦而先之經義以觀其窮理之學則其本立矣次制詔論判而終之以策以觀其經世之學則其用見矣窮理以立其本經世

以見諸用是雖科舉之制苟于此而盡焉則古之
所謂德行道藝之教要亦不出諸此而其所以成
人材厚風俗濟世務而興太平也亦豈有不及古
之歎哉然考其歸則所謂窮理所謂經世者恒浮
談冗說修之無益於身心措之無益于國家甚者
口夷齊而身躋跖名伊周而跡斯鞅遂使科舉之
學悉為無用之虛文暨其得而棄之也顧乃以吏
為師以律為治視其昔之所習者曾筌蹄芻狗之

不若噫是豈朝廷立法之意使然哉歐陽子曰三代以上治出于一而禮樂達于天下三代而下治出于二而禮樂徒然虛文然則文與道離而欲據一日之文以盡收夫有道之士不亦難矣乎雖然靜言而庸違者有矣未有不深于道而文能至焉者此科舉立法之深意而今之豪傑亦未必不由之以出是其所謂迴斡通變之機以不失先王之意者乎不然一舉而紛更之吾固未知所以善其後

也

禮科凌義渠正文體疏皇上深軫生民害政之慮
功令日嚴士人久沿譎張變幻之風宿習難醒必
明開條款著為章程如川行之有隄防方足遏其
橫奔潰決之勢如車驅之有軌範方足正其詭過
獲禽之思不則泛泛悠悠即懲創亦已後矣謹擇
其切要列為八條以候申飭一曰崇經孔子刪述
六經垂訓萬世及門之徒皆心通六藝漢承秦火

之餘以明經取士當時大儒若董仲舒劉向蕭望之輩皆兼通數經我國家雖分經取士然未嘗不貴其博雅淹通也蓋天地間名理畢具六經不惟大事業出其中節義文章亦莫能外今士人本經業多鹵莽他經尤不寓目朝夕誦讀惟是坊肆濫刻何當施用若能大其精神研經味道文采蘊籍必有可觀從今場中試卷必全場能博涉經書融會旨趣者亟收之其浮華不根踈淺無味者勿錄

也二曰依注傳註為六經羽翼當年大儒若二程
朱子蔡元定胡安國陳澹輩皆精心理解提要鉤
玄闡前聖之竅奧後學以梯航聖祖頌之學宮
為程士法式諸士體其成言自足發揮妙義何乃
明棄師說踏空求奇崛曲徑而背周行忽型範而
幾躍冶悖違祖訓侮棄前修無怪一入仕途輒多
不軌不物自今制義必準傳註其明為背謬者槩
勿收錄三曰切題夫有題然後有制義近日士人

全無體認漫行浮夸掩卷讀之不知何作夫無儀
的而妄射雖中絲毫不為巧無根底而敷華即炫
衆目總為妖服官不顧職業營私不顧身名此生
心害政之左驗也自今試卷必須切題闡發有全
不相蒙者雖工弗錄四曰當體書曰詞尚體要制
義有體猶身有五官雖貴神俊而位置不可顛越
近日士子藐視矩矱恣意猖狂則顛倒甚也限字
有格而或汎濫浮淫冗至千餘則駢枝甚也或題

中虛字不過助語而牽纏不已則支離甚也又案
牘俚言漫入聖賢精語則猥鄙甚也至割裂扳扯
恢張高大非其文義則荒唐甚矣皆體要不存踰
閑蕩檢之先證也自今取士須準先輩法程違者
不得混收五曰達詞孔子曰詞達而已矣言貴達
意也易曰風行水上渙天下至文貴自然也沈約
亦云文有三易句易讀字易解使事易知近日有
一種不可解不可讀文字實多暗澁不通而耽僻

者喜之試觀唐虞三代及漢唐宋諸大家曾有此
否即殷盤周誥間近倔聲說者猶謂出于伏生年
老之誤況其後新莽援之作大誥以欺世夫新莽
之心術不可學新莽之文曷可學乎自今為文惟
取達意為上其晦澁不可方物者必斥不錄六曰
讀史夫名理具六經而行實載諸列史苟能廣搜
博覽考古知今則事變糾紛自能洞觀其要故武
侯云才須學也士人但知塾師窠塹自甘蔽塞聰

明即歷代書史或難遍觀盡識而通鑑綱目何可不寓目經心從今試卷須遍閱二三場必其洞晰古今博雅成章者方准收錄若舛錯虛浮者縱首場可觀必勿許錄七曰革偽夫書有真偽旨趣自別有識者何難鑒裁自經書列史外諸子百家其可供文薈撮者儘多近有一種偽書淺俗猥庸讀如嚼蠟所載帝王周孔之言不根經傳無識之人津津稱引之凡以飾詐驚愚誣民惑衆其於真正

莫大文章反蔑如也棄周鼎而寶康瓠擲隋珠而
憐魚目此詐偽得售之象豈盛世所宜有乎自今
士子不妨博極羣書而竄竊謬偽者必斥八曰識
務語云識時務者在乎俊傑國家以文章取士正
欲於毛穎間覘其經濟邇來士子全副精神祇寄
初場至于後場不過臨時轉砌一切世務原無講
究主司鮮能留意真才前場取中始覓後場前場
偶落後場即有董賈真才何由物色士之驚浮華

而閤實用則始進之路然也自今取士叅酌後場
其有練習彝典曉通時務如天文地理兵農禮樂
屯鹽鼓鑄律令河渠之類能舉大議而中機宜者
即前場不中亦亟收之若虛謬無當前場可觀亦
弗錄夫文事必兼武脩斯時猶為三年之艾諸士
中有能演習武書及百將傳而能發揮中窾者猶
當急收之遠而備中樞節鉞之選近可資郡邑保
障之才在於遴擇者加之意云爾

明初人才率得之徵聘洪武三年行科舉詔曰自
洪武三年為始特設科舉以起懷才抱德之士務
在經明行修博古通今文質得中名實相稱蓋創
制之初原不拘拘以文義取天下士也六年罷科
舉令有司察舉德行為本文藝次之專用薦辟至
十七年始定科舉制

洪武三年定初場止試本經義一道限五百字以
上四書義一道限三百字以上第二場試禮樂論

限三百字以上詔誥表箋第三場經史時務策一道限一千字以上三場後十日面試騎觀其馳驟便捷射觀其中數多寡書觀其筆法端楷律觀其講解詳說殿試時務策一千字以上最後十七年改定則初場增經義三四書義二次場去箋而增五判三場增策四篇而面試廢矣

洪武間定應試功令四書義主朱子集註經義易主程朱傳義書主蔡氏傳及古註疏詩主朱子集

傳春秋主左氏公羊穀梁胡氏張洽傳禮記主古註
疏後以其說不足以盡聖意乃於永樂中纂四書
五經大全皆令主之今學者不能博聞平生未嘗
閱大全況註疏乎乃每申嚴新說之禁并出入于
大全者皆以為異說近日士子愈不務實學遂自
傳註之外一無所知習書者且不知有註疏習禮者
亦惟知有陳氏集傳而不知古註疏習春秋者墨
守胡氏涉獵左傳之外公羊穀梁且不閱而張洽

直不知為何人矣元人虞集曰國家傳註各有所
主者將以一道德同風俗非欲使專門擅業如近
代五經學究之固陋也聖經深遠非一人之見可
盡試藝之文惟其高者取不必先有主意若先定
主意則求賢之心狹而差自此始矣

薛瑄天順元年會試錄序今皇上膺天命光復寶
祚紀元之春適當會試之期天下士領薦書而至
者蓋三千餘人禮部左侍郎臣榦等以考試官請

上命臣瑄臣原往蒞其事同考官臣溥臣賢臣泰
臣正臣佖臣恂臣世資臣節臣淳臣鏞監試御史
臣烈臣鑑暨百執事罔不夙夜祗承凡三試得文
之中程式者若干名并擇其文之尤粹者彙成錄
臣竊惟為治莫先于得賢養士必本于正學而正
學者復其固有之性而已性復則明體適用大而負
經濟之任細而釐百司之務焉往而不得其當哉
故三代小大之學養士之法皆以復性為本其得

賢致治之效蓋可考矣漢唐以來正學緒微養士
不本于復性往往溺於雜學術數記誦詞章之習
體有不明用有不周雖或有傑出之才亦不過隨
所學以就功名而已其視三代之賢才何如哉至
宋道學諸君子出其論養士之法始皆本於復性
雖其說不得盡行於當時而實有待于盛世洪惟
天眷皇明列聖相繼大建學校慎選師儒其養士
之法必以三代孔孟程朱復性之說為本是以九

十餘年溥海內外文教隆洽士習粹然一出于天
理民彝之正而雜學術數記誦詞章之習剗剗消
磨無復前季之陋雖曰科目以文章取士然必根
於義理能發明性之體用者始預選列類非詞章
無本者之可擬也故其得賢致治之效足以追隆
前古今諸士子荷朝廷正學教養之恩既以有本
之文得在選列行見對於大廷益當以明體適用
自勵隨所器使以忠乎國以愛乎民以贊助皇明

重熙累洽之治於無窮俾正學得賢之效有光于
前有垂于後顧不偉歟三百年試錄以此為第一
而文清學問備見於此

恩例

恩詔各從其類上慈闈徽號則有封贈父母恩立
東宮則有廕子入監恩災異修省則有蠲逋減刑
恩登極則大赦矣立中宮及東宮出閣皆無恩例
若建大工平大賊誅大姦亦有詔皆以類行惟蠲

逋減刑每詔有之

洪武至宣德六十八年間登極立東宮中宮及上
慈闈尊號徽號詔皆無文武官封贈廕子試署實
授恩例英宗登極詔始令署部都督僉事都指揮
署都指揮僉事指揮實授景泰登極詔始令在京
文官及在外方面官一考無贓犯者照洪熙宣德
年例與誥勅景泰三年立懷獻太子詔始令署郎
中員外郎主事試中書實授又與土木死事諸臣

誥敕封贈廕子入監不願入監者聽天順復辟詔
始令内外文武署職試職因功陞授者與實授天
順八年兩宮徽號詔始封兩京文武七品以上官
父母署職試職實授成化二十三年上慈闈尊號
詔兩京文武官七品至四品先封三品以上與誥
命泰陵登極詔内外文官署職試職實授内外武
官天順八年正月以前功陞試職署職遇例實授
該世襲者子孫仍襲其未實授及以後功陞試職

署職實授弘治五年立東宮詔文武官試職署職
年半以上者實授不及年半者扣至實授弘治十
一年清寧宮災詔兩京文武署職試職理刑者實
授歷任未及一考者與誥敕其誥敕准給未領因
事降調非貪淫酷刑者仍給與弘治十八年上兩
宮尊號詔文武官署職試職實授兩京七品以上
文官未及一考與誥敕父母已封者服色許與子
同世宗登極詔正德十四年文武官員人等因諫

止巡遊跪門責打降級改降為民充軍者該部具奏起取復職酌量陞用杖斃者追贈諭祭仍廕子入監讀書充軍故絕者一體追贈諭祭復養親屬嘉靖元年尊號詔兩京文武未一考者與誥敕父母已封者服色許與子同誥敕准給未領因事降調非貪淫酷刑者仍給與嘉靖九年大報禮成詔兩京文官未及一考無過者給與誥勅嘉靖十九年皇子生詔始令兩京三品上文官例該廕子未

及一考者廕子入監兩京文官未及一考者在外
七品以上歷任三年無過者與誥敕文官五品以
上武官四品以上署職試職者并試職御史實授
仍與誥敕十五年立東宮詔兩京三品上文官廕
子兩京文官未及一考者在外七品以上官歷任
三年無過者與誥敕兩京文武官署職試職實授
仍與誥敕十七年郊廟大禮成詔兩京文職並在
外五品以上方面有司四品官未及一考者與誥

敕兩京文武官并新舊武舉官署職試職實授仍
與誥敕十八年立東宮詔兩京文武三品上官與
誥敕廕子二十四年宗廟成詔兩京文官未及一
考者與誥敕署職試職仍與誥敕願貤封者聽崇
禎登極詔内外文武俱給誥敕新科進士許令授
官後即給封典

崇禎己卯三月追崇孝純皇后尊諡為皇太后在
乾清宮行禮旋奉神位於孝先殿有封贈恩典然

歷朝生母多先尊為皇太后後加尊諡為孝某皇
后今先尊為皇后而改為皇太后以皇太后神主
與光宗並列非禮也一時禮官將順圖恩典竟無
言之者

諡法

洪武中諡法皇后太子皆二字諸公侯及夷王亦
二字親王一字要皆太祖親定明明以二字為重
矣然畧無差等義所未安太祖豈見不及此亦知

千秋萬歲後必有加增姑留之待後人而不私其
子曰荒曰愍誥文中皆有貶詞慎重如此雖有詔
賜諡者禮部行翰林院定擬請旨亦立法當如此
自下而上以示公論亦未嘗分如何為一如何為
二也永樂中郡王始二字推之羣臣大約以二為
常以一為特說者謂親王隆重如廟諡十六字歸
重只在末一字以特為尊果爾則以後太子何以
又皆二字耶總之大聖人作法後人仍之不敢改

畢竟以多為貴所謂一字王二字王者亦俗說也
陸子淵深以貞愈於正唐室諡文貞者魏徵宋璟
楊綰庶幾焉蘇瓌有餘愧矣宋室諡文貞者司馬
光范仲淹庶幾焉王旦有餘譏矣矧夏竦乎卒無
文貞避廟諱也明諡文貞惟楊士奇文正則李東
陽謝遷也諡忠文者李時勉諡文忠者曹鼐楊廷
和張孚敬張居正國制一品美惡兼諡二品以下
賢者得諡則易名之典在一品者最多難更僕也

謚法兼用美惡洪武中魯王謚荒伊王謚厲後專
用美謚

文臣有謚自建文朝王禕謚文節始

詞臣得謚文亦有不拘者劉基王守仁文成張益
文僖馮京文簡姚夔文敏黃孔昭文毅周忱唐龍
文襄魏驥文靜吳訥楊廉耿裕文恪儲燿文懿葉
盛邵寶王鴻儒文莊鄭賜文安孫應鰲文恭何喬
新文肅苗衷文康李奎文通劉宣文懿蕭維禎文

昭儀智何孟春文簡王道文定顧憲成端文

詞臣不諡文者曾祭馬愉孫賢許彬襄敏楊鼎莊
敏儀銘忠襄盛端明榮簡王文毅愍陳文莊靖朱
希周恭靖許進襄毅

四品以下官而得諡者僉都御史楊信民恭惠少
詹事劉鉉文恭祭酒宋訥文恪李時勉文忠陳敬
宗文定鄒守益文莊太常寺少卿李奎文通劉儼
文介俱四品

翰林學士朱善文簡胡廣文穆呂原文懿侍讀學
士張益文僖兵部郎中楊繼盛忠愍長史朱復忠
定張景明恭懿俱五品

中允徐善述文肅贊善王汝玉文靖翰林待制王
禕忠文侍講劉球忠愍修撰羅倫文毅舒芬文節
贊善羅洪先文恭俱六品御史鍾同恭愍七品布
政陳選恭愍憲副毛吉忠襄周憲節愍馮傑恪愍
許達忠節知府岳正文肅知縣鄧顥恭毅

已謚而後改者王禕文節李時勉文毅俱改忠文
張玉忠顯改忠武孫忠襄靖改恭憲朱永武襄改
武毅曹鼐文襄改文忠于謙肅愍改忠肅石琚文
隱改文介張治文隱改文毅殷士儋文通改文莊
已謚追奪者張居正文忠吳時來忠恪李燧恭敏
盛端明崇簡

王世貞謚法考序每故事大臣卒禮部以謚請報
俞矣則內閣以二字三請于上而自擇之是以具

釋義也洪武之尚為吳也諸功臣死事有勞而夭者皆榮公侯之爵而傳之謚終高帝世文臣弗得也武臣都督弗贈侯伯弗得也至建文而待制王禕得謚文節矣文臣之有謚自禕始也其諸小臣者亦自禕始永樂之制嚴矣終太宗世文臣之得者僅姚恭靖廣孝胡文穆廣而恭靖之爵則公也文臣之有謚僅文穆一人也洪熙初始大合故臣凡勞于國誼於清宮三品而上易名者十餘人而後

文臣之諡廣然宣英之代猶斤斤焉持其柄而弗輕予且夫魯王愛子也秦王次嫡子也高帝命之曰荒曰愍而登之冊曰不敢以子故而廢天下公其於宗室諸子王尚有評也文臣之有榮願也則瑕弗掩也文榮之有爵也文愍之以事也庶幾寓貶矣婦人之有諡也自后妃而外則死節也公主之有諡也自仁宗之悼愛女始也乳媪之有諡也自宣宗始也乳媪之夫之有諡也亦自宣宗始也

方士之有諡也自世宗始也諡而四字淫矣而使
方士得之則益淫也當世宗之季吾又得二事焉
夏文愍之持秉則同列皆中諡及身以罪死易世
而後牽復所得者中下諡也繼而嚴氏之持秉則
其子為市焉非上所甚注懷者必賄而後得不賄
不得也即得之不腆不上諡也及身以罪竄削弗
諡也夫諡者人主之春秋也尊則稱天以命之不
尊則與天下共隲之而奈何為大臣修怨賈利地

也然則如之何其必略採唐宋故事遇大臣以謚
請有俞旨則翰林之司篆者為議而定二謚焉以
授禮科科詳之復議而上之閣臣復衷而取上裁
凡文臣二品而上及勛親臣公必謚侯伯之蒞軍
府加保傳必謚謚兼美惡二品以下自卿佐以迨
庶僚有德行政術者亦有謚謚則言官請之禮部
裁之有美無惡可也

禮部侍郎郭正域嚴謚典以重公評疏臣惟議謚

最難而議諡於數十年之前尤難蓋棺甫定則輿論方新而是非有據墓木已拱則口碑漸遠而黑白常淆故當日與諡易今日補諡難得諡榮也而補諡尤榮中之榮其法不得不主於嚴當日不與諡易今日奪諡難不得諡辱也而奪諡尤辱中之辱其法不得不主於恕今臺臣疏應議者七十餘人科臣疏應補者十五人臣等參詳各衙門之評品而符以故老之傳聞證以累朝之實錄就不肖

之中而汰其甚必大犯清議有罪可指無功可贖而後議奪就賢者之中而拔其尤必卓有完名其心表表其行錚錚而後議補凡應奪者四人為許論黃光昇呂本范謙溢美應改者一人為陳瓚應補者未經題謚則五人為伍文定吳悌魯穆楊繼宗鄒智已題未結則二人為楊源陳有年此外若徐階媚事嚴嵩人議其諂田連阡陌人議其富而乘時樹立能收鼎革之人心胡宗憲結嚴世蕃而

廣貨賄人議其邪阿趙文華而傾督撫人議其險
而計獲渠魁則除東南之禍本張瀚俛仰時宰人
議其庸而末路庶乎知止余有丁繩矩或踰人議
其蕩而此中亦無他腸陸光祖機權時出人議其
姦而宦蹟自多磊落以上諸臣列之當奪當改之
科似太苛刻臣未敢輕議也若毛伯溫諭服安南
兵不血刃而或謂其功非已出張元禎潛心理學
抗疏經幃而或謂其早不見幾郭希顏攘臂逆鱗

橫被大戮而或謂其考察罷官建言可已劉臺抗
節敢言殺身遐壤而或謂其邊功被誥先發制人
以上諸臣列之當諡當補之科似少精覈臣等未
敢輕許也又如孟秋之孤介張元忭之恬退李遷
陳格之清修事蹟未能臚列而衆議間有異同所
當留之以俟異日論定者也至於臺臣科臣二疏
所未及本部原冊姓名所未載尚多偉人應諡而
未得亦有匪人不應諡而倖得者在原議之外又

當從容採擇公論上聞以補遺漏者也夫自刑賞之窮而有諡故諡重自諡之窮而有奪諡補諡故今日之諡尤重臣等上天天日下天方寸以看議之職掌從類奏之公評期于予者奪者改者補者各無憾于九原之下而已若夫予奪相形忤怨叢集業已甘心任之不敢避也

崇禎十五年禮部覆科臣張國維議疏察得原疏請諡舊例五年一舉當時已缺至十二年而今又

遲十年矣自古帝王治天下惟有賞功罰罪而諡則賞罰之尤大者也近日名教不靈廉恥道喪不知忠孝節義為何物則諡法真勵世磨鈍急務也除鄒元標忠介馮從吾恭定顧憲成端文王德完莊毅趙南星忠毅高攀龍忠憲楊漣忠烈諸臣理學事功忠諫節義皆一代之最已經賜諡外據科臣疏首言革除諸臣次言軍功而於會典所稱節槩勲猷二語尤至慎焉大要節槩以死忠為上如

革除中卓敬鐵鉉景清方孝孺諸人不待言矣近
之忤璫如左光斗周宗建等抗直如孫承宗盧象
昇等殉賊如傅宗龍等指尚不勝屈也勲猷以軍
功為上如萬歷中平哱平播平倭三大案文武功
多可書近日之何可綱曹變蛟以功兼死尤為慘
烈指亦不可勝屈也而有宜申飭者三焉先臣丘
濬謂諡兼用美惡王世貞亦曰高皇帝於子秦王
諡愍魯王諡荒況臣下乎竊謂文臣二品以上皆

宜謚勛戚凡在功列亦宜謚侯伯必蒞軍府有功
方許謚謚皆兼美惡二品以下即庶僚有節烈勛
猷卓然不朽者亦可謚不然官雖貴不謚則陳乞
可清也唐宋謚議掌于太常博士國初令禮部行
翰林院擬奏今宜先以其議責之太常臣部與吏
禮兵各科核定而閣臣詳加折衷始取上裁則事
出于公衆論可服也五年一舉雖有近例然人品
邪正萬目難欺蓋棺論定即可與謚不宜少待致

有沉埋則風勵可速也至發單博訪聽各衙門開
送固為詳慎而彼此稽延終至耽閣既有部科及
太常之議似亦無敢濫徇者苟有不當聽科道各
官糾舉誰敢私之勵世磨鈍實在於此矣

喪制

明初大喪禮今所遵者皆仁宗之遺詔非二祖之
遺詔也太祖則皇太子親王世子郡王及王妃世
子妃郡王妃公主郡主內宮人等俱服斬衰二十

七月臨朝視事則素服烏紗帽黑角帶在京官員
日朝晡哭臨至葬畢而止仍自成服日為始服二十
七日而除成祖則宮中自皇太子以下成服日為始
服斬衰二十七月而除親王以下如洪武在京官
員朝夕哭臨七日又朝臨十日自成服日為始服
衰服二十七日凡入朝及衙門視事用布裹紗帽
重帶素服腰經麻鞋退服衰服二十七日之外素
服烏紗帽黑角帶二十七月而除命婦二十七日而

除聽選辦事等官服衰服監生吏典僧道人等素服以成服日為始各二十七日而除軍民素服婦人素服不妝飾俱二十七日凡音樂祭祀官員軍民人等並停百日男女婚嫁官員停一百日軍民人等並一月寺觀各聲鐘三萬杵禁屠宰四十九日仁宗則皆二十七日釋服諸王世子郡王及王妃郡主以下並服二十七日而除朝臨十日者皆為七日在外則哭臨三日之外更不朝臨無禁嫁

娶音樂自聞喪日為始不鳴鐘鼓在京禁屠宰十
三日然歷朝皆無嗣皇帝用以日易月之文惟正
統七年皇太后遺詔以日易月哭臨三日即止君
臣皆同故神宗於慈寧喪服素者三年所以為至
孝

顧起元喪制論前代服制未有定式我聖祖謂其
君牽制文義優游不斷於是作孝慈錄立為定制
子為父母庶子為其母皆斬衰三年嫡子衆子為

庶母齊衰杖期大哉王言自是人子得申其罔極之情而從來短喪之謬論與拘儒之曲說可廢而不談矣服制圖子為繼母為慈母為養母皆斬衰三年為嫁母出母為父卒繼母改嫁而已從之者皆齊衰杖期為繼父同居兩無大功之親者服齊衰不杖期為繼父先曾同居今不同居者為繼父雖同居而兩有大功以上親者皆齊衰三月於是
以恩服以義服以名服三者曲到周盡無毫髮遺

憾於人心此所以明天倫正人紀順人情為萬世
不易之經也

貽安堂集云三年之喪金革無避蓋魯公伯禽有
為為之也而後世臣子多藉口焉此大謬不然伯
禽一國之主也寇在門庭而宗廟社稷存亡係焉
故權制可從耳若夫疆場小驚非闕大故師濟多
士不乏一人詎可妄援國主墨衰即戎故譚司馬
綸楊中丞鎬皆名教之罪人也何況端揆元宰儀

表百僚當太平無事之日而儼然冠裳苦塊時哉
宋劉公珙固辭召命曰身在草土之中國無門庭
之寇而假起復之名以竊利祿之實切中奪情之
謬矣愚則以雖寇在門庭奪情亦謬宋末九鼎將
遷三靈將改而謝疊山猶力詆當時起復者至謂
宗社之所以為丘為墟生民之所以為血為肉實
由於此

三年通喪古制極嚴自漢文帝命以日易月而臣

下亦因之如鼂錯父死旬日而尚以御史大夫調
兵食翟方進後母死三十六日而復起治丞相事
唐右僕射房元齡中書侍郎蘇頲張九齡宋參知
政事寇準皆奪情起復此外亦不多明初極重此
制以劉基宋濂章溢當帷幄風憲之重於天造草
昧之時而聽其終喪了不之強永樂急於事寄中
外臣僚始有奪情不丁憂者或有於制中起用久
之漸侈為得意恬不為異成化中羅公倫有扶植

綱常一疏詞意凜然所裨於名教甚鉅

邇年大臣多奪情起復恬不知怪得羅一峰一疏振已淪之名教覺久昧之良心此大有關係文字且即以綱常二字為主而反復發明之親切確當若鄒南皋疏則入江陵他事而大意亦與一峰同江陵丁外艱給事中陳三謨御史曾士楚上疏請留於是翰林趙定宇用賢吳復菴中行部郎沈繼山思孝父熙亭穆進士鄒南皋各抗疏糾論廷杖

黜謫有差嗟乎微五君子舉朝皆無父之人矣而
南臯往視四公杖畢乃出袖中疏上之慷慨赴義
尤不可及云

崇禎十一年黃道周糾楊嗣昌不守制疏臣觀古
今治績其典章法度雖受于先王誼不敢改至於
事窮理極亦時變通以盡其神惟綱常所繫為臣
教忠為子教孝垂萬世憲本於民彝不可易也禮
三年之喪君命不過其門兵革鑿凶時出戎右不

施於士大夫宋時武弁如田況岳飛皆累乞終制
皇太祖以劉基宋濂帷幄之任特聽其奔喪嗣後
雖有奪情終違物論嘉靖中年以邊事孔棘起楊
博於宣大還翁萬達於本兵然其時楊博且禪矣
又以夙歷移近雲中翁萬達以尚書降左侍郎棲
遲不十日墨衣視事世宗心非之卒罷閒以去蓋
自是非終喪不稱起復也張居正以不守制損其
勲名是後七十年士大夫守法邊鄙亦無事天啟末

年袁崇煥冒起於右屯崔呈秀醜顏於樞府身膏
斧鑕貽唾西市今去幾何時而士大夫蒙面喪心
營推營復嗟乎天下無無父之子亦無不子之臣
衛開方不省其親管仲至比之玃狗李定不丁繼
母憂宋世共指為人梟今遂有不持兩服坐司馬
堂如楊嗣昌者臣前三月在經筵見其吉服應召
疑其終制今乃未然自嗣昌秉樞亦垂兩年矣不
知其何時居喪何人推轂而顛越至此自有嗣昌

而海內無行蒙垢貽戩其親者皆擲塊投杖思攘
節鉞之柄嗟乎人心之喪亦遂至此乎陛下克己
省躬以禮樂忠孝治天下遇有小小災眚輒減膳
撤樂素服避殿以勵羣臣所以然者陛下為天之
子也天有違行三辰不輯猶之父母溫清不寧則
人子為之引痛不櫛不沐不食不寢以候父母之
平復陛下之減膳撤樂素服齋居所以教孝也又
況於為人臣者其家父母不幸委棄而儼衣冠擁

輿從飛揚暗咤抗顏僚友之前此豈人理之所應
有也乎今宣大督臣盧象昇父殯載途不視含
飯搥心飲血以候奔喪而廷臣動推闊遠難移之
人以緩其事臣見邸抄象昇所請附近撫臣權攝
其事於理可通今又忽有并推在籍守制之旨夫
使守制者可推則是聞喪者可以不去也聞喪者
可以不去則是為子者可以不父為臣者可以不
子也陛下以日月拂經星辰凌犯煇氣違和尚下

詔求言引躬克治明示天下以君臣父子皆受於
天禮樂刑政之所從出毫無可替而人臣以哀毀
不祥之身決裂馳驟彼此相煽以玷陛下仁孝之
治於天地綱紀之常是不宜使天下聞見之也天
下人材固自不乏疆場中外尚可料理即使人材
甚乏疆場甚迫當旁求中外誠信不貳心之臣而
用之奈何使不忠不孝者連苞引蘖種其不祥以
穢天下乎治天下之道無他不過正綱紀審法度

汰濁揚清舉直錯枉當於民心而已民心當則天
心悅天心悅則陰陽調風雨時雖有戎狄之警如
豺虎逸於原田田父乘墉而射之矣不得已相其
要害專力注之使忠臣孝子鼓勵四方衆志可城
也諸忘君親營富貴射生剽飛者豈有毫末利於
朝廷而建官以餌之耶凡人遺其親必不利於君
壞於家必無成於國語云千人所指無病而死楊
嗣昌在事可二年張綱溢地之談款市樂天之說

才智備覩矣更起一不祥之人與之表裏指臬指
臬說夢描風猶狼狽之獸倚肩俱走無從施其鞭
策又何益於重負乎陛下事事欲卓越今古又以
經學範圍縉紳家庭小小勃谿尚以法治之而冒
喪數倫諸臣獨謂無禁臣雖至愚竊以為不可也
修撰劉同升綱常大義疏臣備員侍從待罪二年
每見皇上至孝永慕廟祀敬誠頒行孝經小學風
勵天下聖人心思上同堯舜臣仰窺淵源宣弘教

化竊惟中國所以為四夷觀望賴有倫紀以為之
維也是謂大經原本大經變通其制使倫紀之立
萬世勿墜是謂大權權者權乎其經未有離經而
言權者也是故孝子有終身之喪而聖人制三年
之禮非過於情之禮而不及于情之禮也縱有弗
類必無毀制而忍於其親天性然也臣於楊嗣昌
有不忍言而不容不言者敢昧死為我皇上陳之
臣官史官也依阿諛忍以附閣臣則媿良史上負

聖明下負所學日者策試諸臣簡用嗣昌良以內
外交訐宵旰焦勞如人亟欲疾去雜試諸方以冀
一效聖明之用心亦甚苦矣都門喧傳謂嗣昌縲
絏在身姓名不祥非若軍旅可以凶事行之也臣
所以隱忍未發意嗣昌亦人子也良心不沒父死
謂何必且哀痛惻怛上告君父辭免綸扉庶幾善
承聖意曲盡輿情夫邦政之權亦非輕於揆地也
辭綸扉而掌邦政亦可效於時艱也何乃循例再

疏遽入辦事服緋安忍叛禮滅親垂之史冊萬世唾詈傳之邊徼四裔竊笑以謂國家乏人如此大
臣自處如彼何以彈壓將士之上折服敵國之心
哉夫人有所不忍而後能及其所忍有所不為而
後可以有為臣於嗣昌以其所忍覘其所為嗣昌
之心失而智短也臣已逆知其後已何也成天下
之事在乎志勝天下之任在乎氣志敗氣餒鬼神
矚之必有非恒之災動乎四體病則為狂魄已先

奪如此其人即欲有所用於天下而必不能有所
用於天下明矣嗣昌清夜平旦試一捫心何以對
其父鶴志氣餒敗不知何如即廷辨飾非盡昧本
心而清夜平旦亦必痛心疾首悔其志之短而心
之失也嗟乎彼其之子自忘其父而臣猶責之
亦不足責之甚也且嗣昌自號聞人豈其見不及
此無乃伎倆已窮苟且富貴兼樞部以重綸扉之
權借綸扉為解樞部之漸和議非他票擬由已將

與方一藻高起潛數輩結連邊撫敷同罔功掩敗
為勝歲縻金繒立心如此何所底極獨不畏堯舜
在上共驩誰欺而欲以袁崇煥之故智用於此日
不見皇上之處崇煥不動聲色而忽奮乾斷乎曩
是皇上切責而嗣昌不可以為臣今又一旦忽易
墨線而嗣昌不可以為子若猶附和黨議緘口全
軀不惟臣以為不可天下後世皆以臣為不可臣
不及遠引古昔近如李賢奪情人望頓失張居正

奪情身名不終夫物未有本實先撥而傾折不隨
之者也豈非志敗氣餒已事之明證哉國家亦何
賴焉當賢居正時抗言而犯其鋒者先臣羅文毅
倫鄒忠介元標是二臣者初入班門直節報主臣
生二臣之鄉志二臣之學當言不言顏面何施且
臣念及先臣應秋而不禁哽咽沾臆也先臣起家
及第五載講幄疏納忠爭冊立講冠婚東封議起
力排和戎後先忤姦輔申時行趙志臯遂嗾羣小

陷以不測皇考深憐忠直皇祖特鑒清操得免身
家之危卒至憂憤而殞伏遇皇上登極賜諡文節
臣一介書生欽蒙皇上特恩親裁進士第一寵錫
隆盛感激涕零父母髮膚竭盡思報臣之一家皇
祖所保全之一家也臣之一身皇上所生成之一
身也兢兢勵志惟恐有負知遇欲尸默充位義之
所不敢出也瀝血拜疏冒犯新參罪無所逃然生
死榮辱皆是致身之地臣亦違恤其私也伏乞皇

上廣擇芻蕘折衷典禮勒令嗣昌終喪守制庶幾
綸扉不玷倫紀無斁

編修趙士春扶名教疏臣草茅賤儒世受國恩蒙
皇上拔置上第授臣史職二載於茲感恩自勵中
夜以思今時事多艱人情積玩外敵內寇餉匱兵
單豈獨一時諸臣才力不堪驅策哉良由功名之
計愈工而忠孝之性未至故也樞臣楊嗣昌墨縑
泣事拮据罔效荷皇上特達之知簡入綸扉使嗣

昌而猶有人心者當念代言非金革之比累朝有
糾正之條聖經賢訓昭布森嚴自應力辭新命天
報中樞乃讀其勉承恩命一疏計較於歲月久近
之間絕無有哀痛惻怛之念遂儼然服緋到任聖
人之言曰食稻衣錦于汝安乎臣于是歎嗣昌之
胸無天倫目無清議而忍心害理舛悖一至此也
伏誦聖祖六諭必先父母皇上初政首闡孝經在
閭巷猶欲教以人倫豈端揆可先容其掃棄臣又

考之祖訓國初陞六部尚書正二品以中書之事
分隸之是今之尚書猶宰相也景廟之朝于謙孝
廟之朝劉大夏倚毗親切未嘗以東閣處之蓋以
六卿之職展布有餘名位未嘗不足故也今即使
嗣昌而果才也司馬之官儘堪報効何況紙上勦
撫無救民生局中款賞坐傷國體業于封疆無補
豈云幾務可參將來幾務為重必反謂封疆可卸
徒以梯榮之計遂其卸擔之謀既無以責嗣昌之

成功又無以作滿朝之忠孝臣所謂不如還樞臣之職以維名教者此也然臣于是更有進者仰窺我皇上軫念時艱求賢若渴不得已而破格用人奪情起復者實由人才缺少之故然臣以為天下未嘗無才而皆向來大臣不肯實心講求之故夫無事不講儲才有事輕言破格終身之職業未見他奇而一日之機緣已蒙倖進此豈可謂用人無弊之道哉臣謬懷管見不遑詳舉敢以一二為皇

上陳之今時事最急無過兵餉屈指中外但得數十人而天下之事集矣督撫者治兵之人也得其人以聽之本兵則鎮戎道將可次第問也布政使者理財之人也近來視為監司常缺而不精求其選計無誤於此誠得其人以聽之司農則屯鹽鼓鑄可覈實舉也凡此數十人者其始莫若責之大寮之保舉而又非泛然舉之也宜倣古周官六計分其科目而辨論之如所謂廉而敏者理財之選

明而決者治兵之選是也得其人而衆皆曰賢付之中外職掌可也得其人而不敢遽信其人則但置之班行時賜接見敷奏明試深觀而熟察之常使所儲之才多於所供之職又安用此縲紲之夫宣勞王事於是明著令甲永禁奪情綱常名教昭然白日豈非大聖人立法超出尋常萬萬哉臣所謂亟應講儲才之法以禁奪情者此也臣新進孤立何敢輕瀆宸聽惟是結髮受書臣父隆美嘗教

以臣祖先臣用賢當神祖初年輔臣張居正蔑倫
起復臣祖慷慨建言為鄒元標諸臣之倡幾斃杖
下腊其敗肉以示子孫臣愚陋敢背家學而忘先
訓如今者坐視樞臣蒙面入直綱常掃地而嘽嘽
不言是上負堯舜之主而下忝所生矣有臣如此
又安用之冒昧愚忱罪無可逭伏乞聖明垂照焉
南道御史成勇倫常萬古為重疏臣竊惟天地所
以不毀者人為之維也人類所以不絕者禮為之

維也故記曰禮也者猶體也體不備君子謂之不
成人聖人作為禮以教人使人知所以自別為禽
獸者禮而已矣禮莫大于倫倫莫大于君親未有
不知有君親而可以齒於人類者也今夫繩樞甕
牖之子匹夫徒步之人有人焉指之為無君無親
則怫然作色何也恐不可齒於人類也况儼然秉
國之軸四方是維天子是毗者而肯認其名乎臣
謂欲避其名當無其實苟實之有而名是避又從

而箝人之口廟堂即不議之草野得而議之薦紳
即不議之庶人得而議之當時即不議之後世得
而議之白簡之糾彈可箝青史之斧鉞可箝乎臣
始謂輔臣楊嗣昌不知有君親之人也固不敢以
忠孝責之今嗣昌疏中有仁不遺親義不後君之
語反覆辨論無非避不忠不孝之名是嗣昌猶知
有君親也猶可以忠孝之言告臣不敢勦襲他人
之說但就嗣昌之疏以詰問嗣昌可乎嗣昌謂古

之君臣列國之君臣可得而避今之君臣一統之君臣無所逃於天地之間是三年之喪可行于古不可行于今也不知嗣昌所引者何古所指何臣所據者何代之經所遵者何國之典豈非聖諭所謂另一邪說者唐虞三代未聞有奪情起復之事固勿論漢唐宋皆一統也有宋去今未遠即以宋言之遵禮經而不起復者富弼劉珙也循故事而不起復者陳宜中賈似道也嗣昌將以富弼劉珙為

忠乎抑以宜中似道為忠乎嗣昌雖巧文辨慧必不敢以富弼劉珙為非而以宜中似道為是宜中似道固無所逃于天地先得嗣昌之所同然矣不知富弼劉珙當時安所逃乎信如嗣昌之言是天下凡為臣者皆不當終三年之喪終則為後君為不臣先聖之詩書可焚先王之典禮可廢不舉人類化而為禽獸不止也留一嗣昌而生天下不臣不子之心何如去一嗣昌而樹萬世為臣為子之鵠

嗣昌之妄為附會而不讓謬為飾說而不辭者豈自以一身之去留係社稷之安危而為天下所無乎將嗣昌之學術天下無耶嗣昌之經濟天下無耶嗣昌之品望天下無耶忠孝之旨不明無問其學術矣秉樞兩年一籌莫展邊警頻告流氛披猖無問其經濟矣清議不畏名教不畏經典之詞不畏萬世之公是公非不畏無問其品望矣嗟嗟嗣昌去則所全者亦大既盡子道亦完臣節不去則

所失者亦大既為今日之賊子而敢於排羣議必
作他日之亂臣而敢於變舊章最可異者嗣昌既
不知有親矣又執猶子之義事程國祥三十年者
何也豈非為其父之同籍乎讓行讓坐何時猶
知有親欲廢朝廷之禮以伸其私情也政孟子所
謂不能三年之喪而緦小功之察放飯流歠而問
無齒決者此臣之所大惑也臣極知言一出而禍
隨而不忍默默者臣蒙皇上特恩改置言路是以

言責臣也君有責于其臣臣有死于其言事關綱常
倫理者不言更有可言者乎此臣寧冒犯天威以
明受祿不誣之誼不敢承順意旨以長指鹿為馬
之奸臣不識忌諱出語顛直鼎鑊斧鑕臣所願甘
伏惟皇上鑒其狂瞽

武陵聞喪不奔衣緋到內閣大學士任六垣例有
公揖叱出遂具公疏糾之及黃宮詹之疏上即召
對宮詹言奪情之事在兵部猶可在內閣則不可

在一人猶可又引一不奔喪之陳新甲則不可上
雖責其過激未始不心折之武陵乃募人糾之降
六級調外劉趙二太史俱褫職成寶慈侍御逮至
令拷問主使後以清獄遣戍南樞范質公先生亦
以疏救宮詹間住一時仰諸君子如山斗焉然國
之元氣自此斬矣

呂坤三年之喪解或問三年之喪不三十六個月
止于二十五月而畢何也曰喪者親始死之日也

十三月再見親死之日也謂之小祥尚在吉凶之
界二十五月三見親死之日也謂之大祥言祥莫
大乎是始棄凶而從吉矣是月也有餘哀焉心怛
怛而不忍情戀戀以增悲又一月而為中月乃行
禪祭禪者澹澹然平安矣作樂歡笑如他日然飲
酒食肉如衆人然蓋自二十五月已屬餘哀二十
六月已無餘哀先王制禮雖聖人不敢過也近世
迂儒有執喪三十六個月者是不明喪之一字也

或問不計閏何也曰計閏則短一月不見三年之喪矣假如二月十五日親喪必待又明年二月十五日始經三見親喪之日若計閏則正月十五日為二十五月矣是短一月不見親喪之第三日也故不計閏非謂以厚為道也近世俗更有親死于閏二月十五日不補前月為計閏二十五月之後值閏二月十五日以不服後月為計閏者皆送問治罪是不明不計閏之旨也有二十七個月外責

餘哀三個月餘哀之中起文赴部者亦送問治罪是不明二十五月而畢之說也總之三年之喪實服二年故曰再期而大祥嗟夫古三年之服曰居喪曰宅憂不御酒肉不治生業廢祭祀謝交游詩書不事學問不談不見齒不入室寢苦枕塊禮壞樂崩故七百二十日不為不久後世為素冠白衣在身而已百不異常可謂居喪乎可謂宅憂乎雖縗絰終身可也

顧起元期功之喪論喪禮之不講久矣前輩士大夫如張憲副祥有期之喪猶若齊衰見客其後或有期功服者鮮衣盛飾無異平時世俗安之恬不為怪間有守禮者恐矯俗猶不敢行也昔晉人放曠禮法之外為儒者所詬乃其時陳壽居喪病使婢丸藥坐廢不仕謝安石期功不廢絲竹人猶非之視今日當何如哉余謂士大夫在官有公制固所不論至里居遭喪即功亦宜示稍與常異如非

公事謁有司不變服不赴筵會即赴亦不聽聲樂
不躬行賀慶禮不先謁賓客庶古禮猶幾存什一
于千百也

戒奢

萬歷中禮部尚書沈鯉疏近該吏科給事中楊文
舉具奏奉聖旨近來習尚踰侈冠服詭異著都察
院出榜禁約還著緝事衙門並五城御史不時訪
拿該部知道欽此欽遵明旨森然固宜朝令夕改

月異而日不同矣乃數日以來察諸衢肆驗諸士
民綺衣華履之輩尚爾優游鏤金刻玉之工居然
布列此非法禁之不嚴亦由禮教之不明耳蓋帝
王之所以整齊天下者不過禮刑二端顧刑惟治
之于已然之後而禮則防之于未然之前故聖王
不遽用刑而必有禮以先之所以納民于軌物止
惡於微眇使之遷善遠罪而不自知也我國家稽
古立法品式具備如大明會典諸書備載官民服

色冠帶房舍鞍馬等項貴賤各有品制所以辨上
下定民志者嚴矣奈緣風會久而易流人心習而
多玩兼之方冊所載申布不常典制諸書市肆罕
鬻士生斯世尚有懵然不知者而況蚩蚩之氓乎
有財者以為吾力所能為有位者以為吾勢所得
用好異者以矜其奇詭之習射利者以窮其心思
之巧憲典雖在而尊信罔聞則有由矣及今若不
稍為申飭而概以法令繩之恐無知抵禁所傷必

多非聖天子前禮後刑之意也臣等忝居禮官敬
循職掌仰遵大明律令洪武禮制諸書及累朝事
例參酌互考摘其緊關日用者數條即以今之違
式越制如聖諭所云侈靡詭異之類者附列其下
上塵睿覽伏望聖明采納勒下本部刊刻榜文張
掛都邑勒成書冊傳布天下然後責成巡城御史
省直撫按嚴加緝訪俟令下半年或文到一月之後
敢有仍前僭違即係明知故犯定行依律問罪財

物入官若工匠技藝造作淫巧織鏤違禁者從重
究遣務在著實舉行不得虛應故事夫先有禮以
防之而後有刑以驅之庶乎陷溺之人心或可挽
奢靡之風俗或可移不至令之不從而禁之不止
矣抑臣等又伏思之物之相效之謂風民之從好
捷于令頃者我皇上一御布袍而百辟景從萬姓
歡呼轉移之效亦可睹已至於輦轂之下勛戚貴
近勢家大族亦衆庶之所觀倣而法行之所自始

者伏望特布綸音更為申飭俾其贊一人以崇儉
德先庶民而會皇極則都邑之中轉相視效寔成
習俗當自有不令而從不禁而止者而海內亦喁
喁向風矣臣等無任惓惓懇祈之至謹題請旨

崇禎十六年十月十六日內閣揭帖適奉御批禁
奢靡止宴樂前已與先生每面諭還宜擬旨通飭
朕于冬至正旦壽節端陽中秋及諸大典禮陞殿
行禮方許作樂其餘皆免朕浣衣減膳已有諭旨

今用錫木磁器以示儉約其金銀各器係闕典禮者留用餘貯庫以備賞賚内外文武諸臣俱宜省約專力辦賊太平之日照舊先生每再將先年舊旨參看議妥來行欽此臣等叩頭恭誦不勝讚服竊見近日風尚之奢日甚一日其僭幾至于無等其費總出於民間嚴諭累頒積習未變真可痛恨皇上諄諄戒飭且特以身先之至于典禮慶賀之外暫撤宮懸衣服澣濯之餘仍裁玉膳器用錫木

居然匏尊土簋之風庫貯金刀預為行賞酬功之
用恭惟聖祖時亦曾取法木輅示訓露臺洗表袂
而得金緝片毯以為被蓋深得古帝王菲食卑服
之意而在今日則裕民足國節儉為先勦寇滅敵
憂勤尤亟誠可以遠光祖德下悚官方矣至宴樂
一事尤為妨廢職業而京城首善倍宜力行禁止
并服舍器用輿蓋等項典制甚嚴尚多侈肆皆不
可不痛加裁抑者誠辨上下定民志一大端不獨

省財節費而已

天順時禮部尚書胡濙省冗費議欽天監歷日五十萬九千七百餘本省為十一萬九千五百餘本大醫院藥材九萬八千一百餘斤省為五萬五千四百餘斤光祿寺糖蜜果品減舊數三之二其漆造腌臘雞鵝猪羊二萬七千隻子鵝二千隻酥油四千斤盡行革罷厨役六千四百餘名揀選老疾者悉皆放回湖廣江西等處薦新茶芽七千五百

餘斤省為四千斤上允之風俗儉樸必自朝廷始
此端本之道也

劉玉懲奢說一飯百金一衣千金一居萬金上之
風之下之從之俗焉有不靡乎犬馬穀食奴隸肉
食倡優玉食食焉有不匱乎庖者海陸織者文穀
匠者篆刻用焉有不費乎緇黃不炊而食游惰不
耕而食商賈不儲而食工以藝兵以力士以志公
卿大夫以能大率農一而供十人天下焉有不窮

乎嫁者累車莖者殫家貧富相企而日有加愚不肖相傾而日蹈於邪習焉有不陋乎嗚呼弊也甚矣上之人必躬節儉而後民風可移嚴制度而後民志可定去奇衰禁淫汰而後民用可足省末作驅游民而後民力可完民力完民用足民志定民風移而後禮樂興刑罰措禮樂興刑罰措而後萬物阜天下安

潘壻前輩風範紀壻為諸生時將郡博吳先生命

往見鄉先憲副行素韋公

斌字秀質

先見其二子

元嘒李勉

通刺公出面西南塤拜致郡博之意公唯唯覆數

語而入命其子延坐啜以茶塤他日為給事中歸

謁行太僕貫初顧公

達字右道

公時年七十有六聞塤

至衣冠扶杖出塤再拜問起居公引之上坐三讓

塤遜避至再曰老先生有三可尊何不虛此坐以

勸後進使知長少之序公瞿然以杖戳地曰老夫

今日乃得聞此語坐吾不敢復讓翼日之清江浦

見河陰令雙槐張公

素字元卿

乃先謁倉曹同年戴君

冠字仲鶚

倉曹曰子往見雙槐先生乎幸為冠先容頃

晨往值公盥櫛侍于次而倉曹至公乃出衣冠甚
古與倉曹修禮既轉而南向塤拜公立受扶而起
塤則再拜公嘖嘖有勸勉語倉曹退塤復侍坐頃
之奚奴拂几案出穀簌各二器酒三行飯二盂禮
甚簡及塤避喧湖西公時八十七壽不遠三千里
駕小舟過訪言笑竟日飯則飯飲則飲薄暮始歸

暇日數貽以詩自署雙槐老素其風味意態近世
所未有也夫三公皆鄉先生杜門肥遯同一高致
行素未嘗與人輕接貫初雙槐尤索居離羣意更
瀟散見行素則少長截然凜若師傅見貫初遲十
五年已煩遜避增感慨其時可知矣見雙槐則超
出流俗偃然以前輩自居以子弟最後進夫三公
之行不同同一持風範勵風節若行素之嚴而正
貫初之通而介雙槐之簡易而直皆可敬而仰者

也非某之所能及也或曰見行素埶少也賤是不然使公居今日接見少年輩能復如前日否耶
拜禮

劉三吾禮儀定式序言拜禮先稽首四拜後叩首
一拜為見君上之禮拜止于四為見東宮各親王
禮見父母同四拜禮見親戚官長止二拜禮

古人作揖口中唱之故謂之唱喏至今而廢當時
謂之啞揖

呂坤南禮辯國朝尚左天下皆尚左或曰南人尚
右非也南人並行偶坐何嘗尚右哉惟是作揖一
事讓人于右居已于左曰行南禮南人亦不自察
其所從來耳蓋宗廟朝廷之禮尊南面者也非以
尊我也南面之東為左西為右今文武之立班是
已及其轉身而拜亦東為左西為右何嘗不左重
哉自北面者視之則東為右西為左不知尊有所
在蓋論南面者之左右非論北面者之左右所拜

在南面之人非右班拜左班之人也至於賓入主人之門非朝非廟無南面可尊主人讓賓自以東為左安得以無所尊之客位而行有所尊之揖拜哉且非阼階西階古人設兩階之初意也居己于左而居客于右南禮之誤也無疑矣若曰南禮尚右則不差揖拜則差行坐二者必居一非矣或曰古人尚右今人尚左孰是曰古人是天道自中極而左旋起向右也地道自西北而東南高在右也

神道坐西東向尊在右也人道右手用事權在右
故行步右足先發而左足次之起拜左足先屈而
右足先伸八卦之位乾在右古今簡冊之序往為
右古人重右因其自然順其當然也今人重左高
者抑之下者舉之也論理勢則重右是耳

呂坤婦人拜辯拜屈也折節以示屈不敢直躬之
謂也男子以伏興為拜婦人以屈膝為拜斷斷乎
無兩說矣考之古禮男子再拜婦人四拜謂之夾

拜蓋男子鞠躬婦人立屈膝男子拜婦人又立屈膝男子再鞠躬拜婦人又兩立屈膝是謂丈夫兩拜婦人四拜也今制太子與妃初見帝后太子四起拜妃八立拜惟是致詞妃亦同跪其興也太子俯伏皇太后皇后慶節命婦朝賀先立四拜引班首至殿上內贊跪外贊皆跪丹墀諸命婦皆跪致詞稱賀畢不贊俯伏直贊興復位立四拜而禮畢今南方扮戲子婦上父母壽子俯伏婦人雖跪而

不俯伏猶有古人之遺意焉蓋婦人興伏為拜起
于武后臨朝袞冕郊天俯伏拜興而行天子之禮
後世用之今士大夫庶人親迎夫婦拜天地拜舅
姑尚有婦人同夫拜興拜興之事而丘瓊山家禮
儀節父母醮女尚有拜興之文皆謬也故珠冠之
制俯首不得為不俯伏無墜髻落冠之憂故不嫌
于重耳每問中常侍宮人見后妃當以何為禮曰
宮人遇后妃則叩首而行遇朝賀亦只立拜相沿

謂叩頭為小禮立拜為大禮耳春秋傳云三肅使者蓋婦人以立拜為肅拜故周禮九拜之法有肅拜註曰婦人之拜也近世婦人簡書加一端字則非古矣又曰歛衽萬福則不經矣婦人喪禮亦有稽顙之文蓋叩頭之及地者余非謂婦不叩頭但伏興為拜則不可耳且拜無奇數或再或四或八或十二其奠獻跪而俯伏非拜也故贊者不列于拜數今臣子謝恩禮稱五拜三叩頭載在會典禮

臣殊失本意矣蓋四拜四叩頭耳四拜畢不贊拜何以叩頭其實第五拜為一叩再加三為四叩耳或曰拜為兩手齊下惟男子為然曰非也婦人立拜不兩手齊下乎今鄉俗以立拜為輕以叩頭為重故婢妾見主人不敢立拜正是叩頭則知叩頭固重立拜非輕也簡而便故輕之耳

肩輿

宋南渡以前士大夫皆不用轎如荆公伊川皆云

不以人代畜朝士皆乘馬或有老疾朝廷特賜猶力辭南渡後則通行轎矣明初雖公侯不得乘轎兼不設馬斃文職四品京堂開棍乘馬用斃五品光祿太僕寺丞翰林院五品六品官宮坊官亦用斃其餘皆用交床按唐制步輿之制三品以上及刺史有疾暫乘不得舍驛宰相三公師保令僕諸司長官及致仕官疾病許乘檐如漢魏載輿宋政和七年詔非品官之家不許乘煖轎武臣任主兵

差遣緣邊安撫官走馬承受並不得乘轎

萬歷中四品官以下俱用兩人肩輿稍顯者或用
四人帷轎然置棍于後示不敢也後至魏忠賢執
政以御史林一翥從輿上責內使遂嚴禁焉至宗
禎初給事傅概以請上不允御史郁成治遂請自
御史驄馬之外餘不能雇馬者用竹小兜上以其
欺詰責謫之

薦新芽茶

王應軫疏節該禮部題為前事奉欽依這芽茶解
納供應都只照舊例行不必紛更此誠陛下愛恤
民財之盛心憲章舊制之美意臣下所當順奉而
遵守者也但照舊之旨二說可通彼此意見各有
所執禮部則以為解納自有原額如六安茶芽三
百斤正數之外不可加者此其舊例也光祿寺則
以為供應有常規如歲用六安茶約餘四百七斤
故三百金正數不得不加者此亦舊例也照解納

之舊則不足供應照供應之舊則有傷解納若不
申明終無定守臣等各該巡視監收思得惟正之
供固不可擅增備獻之物尤不可暫缺六安茶芽
歲額三百斤此多取毫釐即為因公科歛雖該部
審據解吏聞報三百袋袋多四兩有餘亦非勘合
正數且無批文查銷以後或輕或重焉知誰公誰
私不如通融議處立為定規每歲六安茶止收三
百斤正數其耗餘加增一槩不許濫取本寺供應

取足薦新并日進月進御用之數至于醫房所進
內閣所用盡其所有不足則于常州府等處芽茶
擇以供給蓋茶取于細其味畧同何必拘執以致
煩難部寺前後所論正欲出入有經如此裁省庶
有司可守原額以照解納數該署可因便宜以照
供應之舊而不必紛更矣見解納六安州并常州
府等處芽茶正數之外尚有多餘之數欲給領回
則有盤費之勞欲令變賣則有侵欺之弊況既名

上供難以退出原有封袋難以折除合無收貯該
署作正公用或准下年該解之數今後各處芽茶
俱照原額解納每斤裝成一袋每袋贏餘二兩以
補絹袋紙包之數永為遵守一體通行

外藩

嘉靖十三年禮部題使臣出入疏據提督會同館
主事張鏊呈據朝鮮國使人蘇沆讓等呈前事竊
照本國粗識禮義至誠事大朝廷待遇有同內服

凡本國使臣到京自行出入不見防範迨至于今
敬謹彌篤別無違異近年以來始加拘禁鎖閉館
門遇有稟奉公幹只許通事一二員刻期出入著
令館夫帶牌管押有礙舊式查得成化六年二月
間本國陪臣權咸等赴京時分禮部發到榜文該
奉聖旨會同館安歇一應朝貢四夷使客出入舊
有禁例今後不許無故往來街市該衙門知道欽此
本月十一日武都督到會同館宣諭聖旨因通行禁

鎖將朝鮮使臣并禁令後依舊出入即令撤去榜
文又該弘治十三年五月間有外國貢使在會同
館內殺死同來貢使兵部奉聖旨備由出榜曉諭
朝貢夷人著令在館不許出入并本國一體防範
禮部主事劉綱陳言奏本查得先該本部見行事
例朝鮮素守禮義敬事朝廷比與他夷不同進貢
人員事例出入原無防禁近該兵部等衙門會議
禁約將前項事例一槩革去以致提督官員嚴加

拘禁不得出入合無仍照前項舊例朝鮮人員令其自行貨賣深為便益奉聖旨是欽此本國使臣出入自由無有防禁在嘉靖初年主客孫郎中無緣拘禁不許出入至嘉靖四年八月內有陪臣鄭允謙等前赴京師將前項節奉欽依事理告要照舊自行出入蒙部准告查照舊例許令自行出入已經本館移文知會去後有提督陳主事執已不遵迫束愈嚴久莫申省貽此因循遠人慕義之望

殊用缺然所以區區陳瀆不能自默者豈是意在
買賣以圖復舊哉其拘閉與否亦非有他虧益祇
以一視之仁罔有內外使之觀游無間光瞻禮儀
考質文物薰炙遷化大有開益此實敦懷柔之至
意獎事大之蓋誠俾我遐服永荷寵靈綿歷萬世
與之匹休爾在先本國使臣人等入貢到京常飭
下人務令循度猶恐或有非違十分畏謹卽自禁
制嚴密比前尤甚在館防閑有似囚繫非惟有違

舊行之規恐非累朝優待之意伏乞照依舊例許
自出入以示聖朝優容之典不勝幸甚等因查得
朝鮮國使臣素守禮義節年慶賀到京本部查照
舊例待遇以禮於國子監等處聽令謁拜於一應
貨賣聽其自便近年以來止因遠方夷使跟隨人
役多生事端該管官自始行一槩約束加嚴而使
臣頗嫻禮義委與他處夷使不同朝廷自來待遇
以禮出入不防具有舊例所據蘇沆讓等具呈前

事相應議處其呈稱欲觀游無間光瞻禮儀考質
文物薰炙遷化固見其仰慕上國之誠但遠人言
服既殊易罹國禁亦須曲為之處合候命下每五
日一次許令該國正使及書狀官人等出館于附
近市街觀游本部仍劄付空閑通事一員陪侍出
入以示禮待防衛之意其隨從人仍行照前拘禁
不許擅自出入庶幾不拂遠人之情不廢上國之
法矣

禮部尚書夏言進使琉球錄疏祠祭清吏司案呈
奉本部送禮科抄出吏科等衙門左給事中等官
陳侃等題切念臣等奉命往琉球國封王行禮既
畢因待風坐三閱月而後行無所事事因得訪其
山川風俗人物起居之詳杜謬數言遂成一錄錄
之意大畧有二臣等初被命時禮部查封琉球國
舊案因曾遭回祿之變燒燬無存其頒賜儀物等
項請查于內府各監局而後明福建布政司亦已

年久卷案為風雨毀傷其造船并過海事宜皆訪
于耆民之家得之至于交際禮儀無從詢問特令
人至前使臣家詢其所以亦各彫喪而不知後海
道往來皆賴夷人為之用其禮儀曲折臣等臨事
斟酌期于不辱而已因恐後之奉使者亦如今日
故著為此錄使之有徵又嘗念國家大一統之治
必有信史以載內外之事如大明一統志者中載
琉球之事所云落滌者水移下不回也舟漂落百

無一回臣等嘗懼乎此逕過不過是險自以為大
幸至其國而詢之皆不知有其水則是無落滌可
知矣又云王所居壁下多聚鬴髀以為佳臣等嘗
疑於此意其國王光悍而不可與言也至王宮時
遍觀壁下亦皆累石國王循循雅飭若儒生然在
彼數月雖國人亦不見其相殺又何嘗以鬴髀為
佳哉是志之所載者皆誤也不特志書為然杜氏
通典集事淵海羸蟲錄星槎勝覽等書凡載琉球

事者詢之百無一實若此者何也蓋琉球不習漢
字原無志書華人未嘗親至其地胡自而得其真
也以訛傳訛遂以為志何以信今而傳後故集羣
書而訂正之兼以夷語夷字并附於後實不足以
上塵睿覽但念海外之事知之者寡一得之愚或
可以備史館之採擇伏惟陛下恕其狂僭下之禮
部詳議施行等因奉聖旨禮部看了來說看得琉
球國遠在海濱華人鮮至其地是故國俗土風知之

者寡今按一統志等書所記事本傳聞殊載未盡者據給事中陳侃等親歷其地目擊其事山川風俗之殊往來聞見悉出實錄因採輯事跡撰述成書既以正載籍之所未盡且俾後之奉使者有所考見足見各官留心使職誠可嘉尚似應俯從所請合無俟命下之日本部將所進使琉球錄付之史館以備他日史館採集

崇禎五年十月朝鮮國王李侗禮重繼序疏臣祖

昭敬王諸子中長曰臨海君肆廢疾不得立歿且
無嗣次曰光海君琿是為廢人次曰定遠君瑋即
臣之父也光海父子既以罪廢則宗祀之托合歸
臣父而不幸先逝臣以昭敬王長孫承昭敬王妃
之命入紹祖統而請于朝廷得完封典感戴皇恩
銘骨難忘顧惟臣既受命皇上忝有王號則所生
父母合有應行典禮而緣疆場多事未即據例奏請
稱謂有缺殊稱不加入子至情豈敢一日自安臣

竊考古禮旁支入繼謂之為人後以孫繼祖謂之
為祖後為人後則重在人後故不敢顧其私孫為祖
後則父雖早卒而得列于正統之序此乃生人之
大倫天地之常經也凡人有祖然後有父有父然
後有孫如曰國受於祖而不禰其禰以祖當禰則
名實各異倫序不明何以為國謹查成化十一年
臣先祖康靖王以其本生考懷簡王為世子早卒
遣陪臣金礪具奏請封憲宗皇帝嘉其誠孝降勅

褒美頒賜誥命東土之人至今榮之況臣有所後
祖而無所後父尊父承祖乃所以尊其祖也名正
而言順事當而禮正情理並伸恩義兩全專在此
矣臣叨守藩服效蔑涓埃而又望推恩之典臣之
愧懼於此實多而仰恃天地父母之仁輒敢專差
煩籲伏乞聖明命下該部通查舊例參考禮典寵
賜爵諡臣母具氏並賜誥命以廣孝思以序天倫
茲實皇朝之寵典而小邦臣民之至幸也

附高麗統系

嘉靖八年朝鮮國陪臣吏曹參判柳溥等呈言本國祖考不係李仁任之後而皇明祖訓及大明會典所載俱屬仁任已於永樂及正德間奏請改正俱蒙俞允迄今尚未行今幸重修會典乞為改正禮部以請上許之詔開送史館纂輯據所陳建國始末言旦初名成桂其先本國全州人二十八世祖翰仕新羅為司空羅亡翰六世孫兢休入高麗

十三世孫安社仕元為南京五千戶所達魯噶齊
世襲其職元季兵興安社曾孫與男成桂避地東
遷至元辛丑當高麗恭愍王之十年有紅巾賊二
十萬衆入境成桂領兵勦賊有功授武班職事恭
愍無嗣陰畜寵臣辛旽之子禍為己子晚多躁暴
為嬖臣洪倫等所弑權臣李仁任車裂倫等於市
立禍為嗣其子昌為世子禍於六年擢成桂為門
下侍中禍遣將犯遼東成桂為副將行至鴨綠江

與諸將議不宜得罪於上國禍懼遜位於昌以洪武二十二年宣諭以偽姓見黜而復王氏之裔定昌君瑤主國事仁任罪竄於外既王瑤又不義國人憤怒乃共廢瑤推立成桂成桂請命於高皇帝乃命成桂為王國號朝鮮改名旦云云

考其國史當元盛時其元孝王者已遷居江華島元無如之何但責其不登陸而已竟臣服於元而終不登陸至其子順孝王親迎王主以元服同輦

入國觀者駭愕時從行宗宰不開剃王責之至其
子忠烈王則宰相至下僚無不開剃唯禁內學館
不剃左承旨朴桓呼執事官諭之於是學士皆剃

春明夢餘錄卷四十